

## الدَّرْيَا أو اللسان (la science et la langue)

الحسن الحافي

المغرب

**تلخيصية:** ف هاذ التوليفة حاولت نتكلم اعلى علاقة الدرايا (la sciences) باللسان او ضرورة تدول الدرايا باللسان الحي اديال المجتمع، شرط لا بد منو باش يتحقق التحضر.

### 1- مقدمة

اليوم مفكرين او مكياسة ف المجتمعات اديال العرب اغلبهم ابعاد اعلى المجال اديال الدرايات كيحاربوا للأسف أي توطين للدرية بالمجتمع بوعي او بغير وعي، كيروجوا لنقاش مغلوط لهاذ الغاية، ماستاغلين الماتاهجيات او الجهل اديال اغلبية الناس ف المجتمع بهاذ القضية. ف كل الرِّيَّات او التحاليل اللي كيقدموا للمجتمع كي طرحوا إشكالات وهمية كتعلق بياش من لسان ايخص تدريس الدرايات، ثم كيوضعوا قودام الراي العام اكالثة اديال الخيارات من غيرهم ما كاين والو. اللول، العربية اديال موزر، الجاوج الفرنسية اديال افرانسا او الثالث النكليزية اديال ميريكان. كيتناقشوا فيهم مرة مرة ف الصالونات او كيتعايروا ف اغلب لوقات ملي ايكونوا قودام الاتباع. ف هاذ المقارعة كتطغى بالطبع الايديولوجية، اللي كيدافعوا اعلى العربية اديال موزر كيرتاكزوا فيها اعلى الخوف اعلى الهوية او ماضي كيصوروه بأنه كان ازمان اديال المجد او العظمة، او إوا كيوخونوا المدافعين اعلى الفرنسية او كيتأهموهم بالتحالف امع الاستعمار او باغيين يقضيوها اعلى الدين او الملة، بينما هاذ التوالي كيشوفوا اللسان لفرانساي لسان درية افرض راسو هاذي قرون او ساهم بشكل اكبير ف عصر لنوار اوزيادة اعلى هاذ الشي كتربطنا بهاذ العالم الفركوني مصالح اقتصادية اكبيرة عندها تاثير اكبير اعلى التوازن أو الاستقرار اديال المجتمع او التعليم بهاذ اللسان يمكن يسمح للمغاربة يتمكنا من الدرايات او الصناعة المعاصرة إلى اقراوا به أو إوا احققوا احلامهم وايدبروا لباس ف المجتمع. أما اللي كيدافعوا اعلى النكليزية فهما غالبا من انصار عربية موزر اللي كيميلوا للمناظرة اكثر من المعيور او المواجهة او اللي كذلك ف الداخل اديالهم ما مقتانعينش بالقدرة اديال العربية اديال موزر باش اتواكب التطور اديال هاذ العصر، غرضهم الأساسي هو اضعفوا القوة اديال الفركونية، فكبيرروا القناعة اديالهم بأن اللسان اديال النكليز هو لسان الدرايا العالمية. ف وسط هاذ الصراع، اللي عامة لمغاربة ما كيفهموا منو غي الخطبة اللي كتهدد ولا كتشهي، الواحد كيتساول واش فعلا لسان لمغاربة اللي قايم بذاتو ما صالحش او ما يمكن تتوطن الدرايا إلا بلسان اجنبي ولا لسان ميت؟ فواش تعليم الدرايا يقتضي هاذ الشرط اديال اللسان بهاذ الشكل؟ الجواب هو لا، الدرايا هي ادراك انساني كوني او يمكن لأي لسان، بشرط ايكون اللسان المتداول؛ لسان حي قادرين امواليه يغنيوه وايطوروه حسب الحاجة اديالهم، وخی ياخذوا من اللسون لخرى ما يحتاجوه ابلا عقدة ابلا خوف باش يبقوا امسايرين العصر اديالهم. هاذ الشي اللي غادي انحاول نشرح ف هاذ التوليفة.

## 2- الدرايا غايتها الصناعة

هاذ الحقيقة ثابتة اعلى ما فات من العصور، ف كل الحضارات إلاّ أو كان الهدف من الدرايا هو الاستجابة لحاجيات التحضر أو الأمن أو الاستقرار. ف بن خلدون من العباقرة المسلمين اللي انتبهوا لهاذ المسألة، كيگول ف المقدمة ف الباب سطاش اللي أمعائونان: "في أن الصنائع لابد لها من العلم" (كيقصد بالعلم الشي اللي كنسميه أنا الدرايا، العلم بالنسبة ليا هو كيقناصر اعلى اللاهوت) (1):

"إعلم أن الصناعة هي ملكة في أمر عملي فكري و بكونه عملياً هو جسماني محسوس" ثم كيگول:

"و لهذا تجد الصنائع في الأمصار الصغيرة ناقصة و لا يوجد منها إلا البسيط فإذا تزايدت حضارتها و دعت أمور الترف فيها إلى استعمال الصنائع خرجت (كيغني الملكة) من القوة إلى الفعل."

ثم كيتابع كذلك ف نفس المعنى:

"و تنقسم الصنائع أيضاً إلى ما يختص بأمر المعاش ضرورياً كان أو غير ضروري و إلى ما يختص بالأفكار التي هي خاصية الإنسان من العلوم و الصنائع و السياسة. و من الأول الحياكة و الجزارة و النجارة و الحدادة و أمثالها. و من الثاني الوراقة و هي معانة الكتب بالانتساخ و التخليد و الغناء والشعر و تعليم العلم و أمثال ذلك. و من الثالث الجندية و أمثالها."

من خلال هاذ النصوص كيبين ابن خلدون بأن الصناعة لابد لها من الدرايا، أو هاذ الصناعة كتطور أو كتزدهر كل ما كان التحضر اكبير، الشي اللي كيخليّ تعليم الدرايات هو كذلك من هاذ الصنائع أو من أجل هاذ الصنائع. حيث كياكد ف الفصل الثالث من الباب السادس "في أن العلوم إنما تكثر حيث يكثر العمران و تعظم الحضارة":

"والسبب في ذلك أن تعليم العلم كما قدمناه من جملة الصنائع. و قد كنا قدمنا أن الصنائع إنما تكثر في الأمصار و على نسبة عمرانها في الكثرة و القلة و الحضارة و الترف تكون نسبة الصنائع في الجودة و الكثرة لأنه أمر زائد على المعاش. فمتى فضلت أعمال أهل العمران عن معاشهم انصرفت إلى ما وراء المعاش من التصرف في خاصية الإنسان و هي العلوم و الصنائع"

ف هاذ الراي اديال ابن خلدون ما دخلش نوع اللسان اللي ايخص كشرط لانتشار الصنائع او تعليم الدرايات، السبب هو انه اهنا كيتكلم كدير اوي بتجرد من أي أيديولوجية، حيث ف هاذ الإطار اللسان هو معطي او امر واقع هو اللسان المتداول اديال الامصار.

ف العصر اديالنا اليوم، ما تلقاش شي ابلاد متطورة ف الدرايا ماشي امطورة ف الصناعة، أو اشحال ما كانت السياسة اديال هاذ البلاد كتهتم بهاذ الارتباط اشحال ما كان التطور التكنولوجي ف الطليعة او كان الاقتصاد اديالها مزدهر او امتالكت اسبابب القوة او الاستقرار. ف هاذ المعنى كيگول العرفاوي الأمريكي إدوار تيلر ( le savant américain Edward Teller ) "الدرايا اديال اليوم هي التيكولوجيا اديال غدًا" ( The science of today is the technology of tomorrow )، او المقصود بالدرايا اهنا هي الدرايا بكل المجالات اديالها، فيمكن مجال معين يلقي التطبيق مباشرة، أو مجال آخر ما نعرفوش لمن

يصلح ف التطبيق اديالو ف هاذ الوقت، يقدر ا يكون عندو تطبيقات اعظيمة ف المستقبل، ابحال مثلا نظرية الأعداد اللّوئية (les nombres premiers) اللي كانت معروفة من وقت اليونان قرون اقبل الميلاد اديال المسيح او كانت كتعتبر رياضة ذهنية عند ديراوة اديال الرياضيات اعلى طول اكثر من 2000 عام حتى جا عصر الرقمية (l'ère du numérique) او صبحت لهاذ الأعداد تطبيقات اعظيمة ف تبادل المعلومات اعلّبعد بأمان، فلو كان ماشي هاذ الأعداد ما عمر يقدر الواحد يتصرف ف افلوسو بالبطاقة البنكاوية بأمان.

### 3- تعليم الدرايا صنعة ما كتتنهاش المجتمعات اديال لعرب

بما أن الدرايا غايتها الصناعة، أو بما أن هاذ الصناعة انتقلت اعلى مرّ العصور بفعل التطور الحضاري من البساطة للتعقد الكبير، فتعليم الدرايا انتقل حتى هو من كونها تتكتاسب بممارسة الصناعة لكونها تتكتاسب بالتعليم او اصبح إوا تعليم الدرايا صنعة. أو بفعل هاذ العلاقة الجدلية بين الصناعة او تعليم الدرايا اصبح التأثير بيناتهم متبادل، فكلما كان تعليم الدرايا متطور كلما كانت الصناعة متطورة او كلما اتطورت هاذ الصناعة إلا او انعكس هاذ التطور اعلى محتوى هاذ التعليم او المناهج او الوسائل اديالو او افرز إوا تطور حضاري او كيساوي (يعني بالمصطلح اللي كيتسعمل اليوم: ثقافي) اجديد. فاشحال امّا أتمكن المجتمع من هاذ الترابط او استوعبوا اشحال ما اقدر ايجاب اعلى كل الاكراهات اللي توقف ف وجه الاستقرار او التقدم الحضاري اديالو. اليوم هاذ الغاية اتجاوزت حتى حدود المجتمع او صبحت كونية تهدف لتحضر العالم او استقرارو او الحفاظ اعلى التوازنات اللي فيه، منها بالخصوص الحفاظ اعلى البيئة، السلم ف العالم، الصحة العالمية، الأمن الغذائي او استكشاف الفضا او غيرهم، باش تقدر تستامر الحياة فوق هاذ الكوكب.

فالّي كان هاذ هو تعليم الدرايا او هاذي هي الغاية اديالو كما فصلها العرفاوي ابن خلدون هاذي اكثر من ست اقرون، اعلاش ما قدرتش المجتمعات العربية تخرج من هاذ الواقع اللي يمنعها من التقدم او التحضر؟ او مازال تعليم الدرايات فيها شبه منعدم او ما عندو أهمية ف السياسات العمومية. هاذ القضية اتناولها ابن خلدون كذلك او بين من خلالها أن عقلية العرب او اكياستهم، خاصة القبائل اللي كانت امهيمنة اعلى هاذ المجتمعات، كانت تحتاقر الصناعات او منها التعليم حيث كان الهمّ اديالهم هو السيادة او الحكم، بينما كان ايبان ليهم أن هاذ الصناعات هي اديال المعيشة فقط او ما عندها تأثير اعلى السيادة او الحكم. ف هاذ المعنى كيگول ف المقدمة:

"و أما العرب الذين أدركوا هذه الحضارة و سوقها و خرجوا إليها عن البداوة فشغلّتهم الرئاسة في الدولة العباسية و ما دفعوا إليه من القيام بالملك عن القيام بالعلم. و النظر فيه، فإنهم كانوا أهل الدولة و حاميتها و أولي سياستها مع ما يلحقهم من الأنفة عن انتحال العلم حينئذ بما صار من جملة الصنائع. و الرؤساء أبدا يستكفون عن الصنائع و المهن و ما يجر إليها و دفعوا ذلك إلى من قام به من العجم و المولدين"

فكانت كما بين ابن خلدون ف هاذ النص هاذ الحرفة من اختصاص العجم اللي هما بطبيعة الحال الفرس او الترك او غيرهم ف الشرق او المولدين اللي هما السكان الأصليون اديال الأندلس من أوروبيين او أمازيغ ف الغرب.

ثم كيين ف نفس الاتجاه ان الناس اللي كيحترفوا هاذ الحرفة اديال التعليم هما من المستضعفين، او أن محاولتهم لتغيير الواقع هي وهم ف إطار الدولة اللي ف نظرو كتقوم اعلى العصبية:

"أن التعليم لهذا العهد من جملة الصنائع المعاشية البعيدة من اعتزاز أهل العصبية و المعلم مستضعف مسكين منقطع الجذم فيتشوف الكثير من المستضعفين أهل الحرف و الصنائع المعاشية إلى نيل الرتب التي ليسوا لها بأهل و يعدونها من الممكنات لهم فتذهب بهم وساوس المطاعم و ربما انقطع حبها من أيديهم فسقطوا في مهواة الهلكة و التلف و لا يعلمون استحالتها في حقهم و أنهم أهل حرف و صنائع للمعاش"

هاذ الكلام اديال ابن خلدون كينطابق مازال اعلی الواقع الحالي اديال المجتمعات العربية. فإشكالية اصلاح التعليم او تعليم الدريات بالخصوص ماشي مشكل سياسات ولكن مشكل عقلية او كياسة متجذرة من هاذي اقرون كتقاوم تعليم يخلق التحضر او التقدم باعتبار أنه كياتر اعلی المجتمع او ايغير البنيات التقليدية اديالو او يدفعها باش اكون تتطور او تتأقلم امع الواقع او المحيط.

ف مقابل هاذ المقاومة لتعليم الدريات، آمنوا العرب فقط بالتعليم الديني اللي هو عبارة اعلی تبليغ خبري ماشي تعليم صناعي، يعني الدعوة الدينية، الشي اللي خلى المجتمع يبقی تقليدي عتيق او امنع أي تحضر ايأدي للتطور اللي يمكن ينتج اعلیه تحول ف العقلية او الكياسة اديال العرب المبنية اعلی العصبية القبلية. هاذ الشي كذلك انتباه ليه ابن خلدون هاذي ازمان حيث ايگول ف المقدمة (1):

"أن التعليم صدر الإسلام والدولتين لم يكن كذلك و لم يكن العلم بالجملة صناعة إنما كان نقلاً لما سمع من الشارع و تعليمًا لما جهل من الذين على جهة البلاغ فكان أهل الأنساب و العصبية الذين قاموا بالملة ثم الذين يعلمون كتاب الله و سنة نبيه صلى الله عليه و سلم على معنى التبليغ الخبري لا على وجه التعليم الصناعي"

هاذ العقلية أو الكياسة تجاه الصناعة ولات كتشكل حاجز نفسي اكبير ف المجتمع، حيث مازال كيتعتابر الصناعي ولا رجل التعليم كينتاميو لفئة اجتماعية ما عندها قيمة، أو ما تلقى حتى واحد من هاذ الفئات راضي او عاجبتو المكانة الاجتماعية اديالو وحي عندو لفوس او عايش لا باس اعلیه. أو بدل الوعي بهاذ البلوكاج الكيساوي او العمل اعلی تجاوزو من أجل التنمية، كيتم تكريس هاذ الواقع بإفراغ هاذ التعليم من أي قوة يمكن اتخليه يتطور لمستوى يعطي تحضر او استقرار. اخطر سياسة ف هاذ الاتجاه هي الدسّان اديال هاذ البلوكاج الكيساوي او النفسي او تدويخ العامة بطرح إشكالات وهمية أو اعلی راسها السؤال اديال اللسان (اللغة) اللي ايخص يمارس بيه هاذ التعليم.

#### 4- الدرايا هي وعي أو إدراك للحقيقة مبنيين اعلی أسس كونية

كيتم اليوم ف المجتمع اديالنا الترويج لفكرة مغلوبة من طرف قوى كتقاوم التحضر او التقدم، كتوضع فيها عملية توطين أو تعليم الدريات ف أزمة غياب اللسان عند المغاربة او بالتالي كتوهم الناس بأن الدرايا عندها لسان اديالها من بين اللسون اللي كاينة ف العالم، هو لسان الدرايا، ابلا به ما يمكنش الدرايا تنتاشر ف هاذ لبلاد، او من هاذ الباب كيشرعنوا لصراعات وهمية بين الأنصار اديال هاذ اللسان ولا هاذا بمبررات ابعيدة اعلی أي منهاج ديرياوي، مبررات ف الغالب مغالطات او معلومات ماشي اصححة او تزييف للحقيقة. اللي كيغبين اكثر

هو ان هاذ القوى كتجر امعها عدد من المكياسة ف الغالب ما كي عرفوش اشنو هي الدرايا او كيحرك الميولات اديالهم التكوين الأدبي اللي اتلاقوه او العاطفة المنكوبة اكثر من لقياس. لوكان الواحد يرجع ايقلب ف التاريخ اديال الإنسانية ملي ابدات الكتابة، أو حتى منقبل، غادي يفهم بأنه فانت حضارات اكبيرة عرفت فيها الدرايات ازدهار اكبير من الصين القديمة، الهند، مصر، قرطاجة، اليونان، المايا او الأنكا او غيرهم. من المؤكد أن الدرايا كانت كتمارس ف هاذ الحضارات باللسون الحية اديال هاذ الشعوب، أو كانت كذلك الحقيقة الدرايوية او الشي اللي كينتج اعليها من تطبيقات كتكطع هاذ اللسون او تتناقل بالفوقي ف الزمن الواحد بين المجتمعات بتنوع اللسون اديالها، او تتناقل كذلك بالعمودي عبر الزمن من حضارة ماتت لحضارة اجديدة باستقلال اعلى اللسان. هاذ الحقيقة هي اللي خلات الدرايا كتتطور بدون توقف او الإنسانية محكوم اعليها حتمية التطور الحضاري المتواصل ابلا توقف او لا ركود. اها لايد ما انشير أن الايديولوجية اللي كتروج ف الغرب بأن ما بين بداية عصر النهضة الاوروباية اللي اعطت الحضارة الحالية اللي هما ف المركز اديالها او ما بين اغبور حضارة اليونان اللي كيستمدوا منها جذور هاذ النهضة، اللي كيتجاوز الف عام، كان الركود الحضاري، ما كترتاكزش اعلى أي حقيقة موضوعية. هاذ التطور اديال الدرايا ف التاريخ كياكد حقيقة أن الدرايا ما كتخضعش لسيطرة لسان امعين ولكن كترتكز اعلى مبادئ كونية مشتركة ف الفكر الإنساني كتسمح لأي أنسان يفهم الواقع او يفهم المحيط اديالو او يوصل لنفس النتيجة مهما كانت الحضارة اللي كينتمي ليها او اللسان اللي كيحبر به.

هاذ الحقيقة كي عرفها كل من اكتاسب ملكة الدرايا او اعرف المبادئ اديالها. هاذ الشي انتابهوا ليه الناس اديال الدرايا من بكري. ف ابن خلدون، ف النصوص اللي اذكرت ف الفصول اللي منقبل، كي ربط الدرايا او التعليم بالتحضر او التحضر ما يمكن ايكون إلا باللسان المتداول اديال المجتمع المعني بهاذ التحضر كما اذكرت منقبل، هاذ المسألة كياكدها حيث ايكول كذلك ف المقدمة (1) :

"و ذلك أن الحق في العلم و التفنن فيه و الاستيلاء عليه إنما هو بحصول ملكة في الإحاطة بمبادئه و قواعده و الوقوف على مسائله و استنباط فروعه من أصوله. و ما لم تحصل هذه الملكة لم يكن الحق في ذلك الفن المتناول حاصلًا".

كذلك أبو حامد الغزالي ف "الإملاء في إشكالات الأحياء" كيلاحظ بأن الحقيقة الدرايوية مستاقلة اعلى اللسان او انها مرتابطة بالبصيرة السليمة أو أن تحويلها للسان ما هي إلا ترجمة للناس اللي ما قدروش يوصلوا ليها، يعني أن اللسان كيحي ف المرحلة اديال التعليم لنقل المعلوم أو النشر اديالو، حيث ايكول (2):

"و أما الصنف الثالث و الرابع فهم أرباب البصائر السليمة الذين نظروا بها إلى أنفسهم ثم إلى سائر أنواع المخلوقات فتأملوها فأروا على كل منها خطأ منطبعاً فيها ليس بعربي ولا سرياني ولا عبراني ولا غير ذلك من أجناس الخطوط، فبادر على قراءة من لم يستعجم عليه و تعلمه منهم من استعجم عليه"

اها ملاحظة ف غاية الأهمية حطها حجة الإسلام أبو حامد الغزالي او اللي ما عمر انتابهوا ليها المسلمين ف هاذ النص، كتعلق بتقريرو أن هاذ الحقيقة مكتوبة بخط مختلف اعلى كل الخطوط او الرموز اللي كتمثل اللسون المتداولة بمعنى ان للدرية لسانها الكوني. هاذ الملاحظة هي اللي استوعبها منبعد مؤسس الدرايا المعاصرة؛ العرفاوي الطلياني گاليلي او

خلاله يحسم قضية ارتباط الدرايا باي لسان، بالخصوص باللاتينية ف القرن سطااش بالإعلان الشهير اديالو اللي غال فيه (3):

« La philosophie est écrite dans cet immense livre qui se tient toujours ouvert devant nos yeux, je veux dire l'Univers, mais on ne peut le comprendre si l'on ne s'applique d'abord à en comprendre la langue et à connaître les caractères avec lesquels il est écrit. Il est écrit dans la langue mathématique et ses caractères sont des triangles, des cercles et autres figures géométriques, sans le moyen desquels il est humainement impossible d'en comprendre un mot. Sans eux, c'est une errance vaine dans un labyrinthe obscur. »

اللي الترجمة اديالها باللسان المغربي :

"الفلسفة مكتوبة ف هاذ الكتاب الهائل اللي ديما مفتوح قدام عينينا، ابغيت انقول الكون، ولكن ما نقدروش نفهموه إلى ما اتدربناش بعدا نفهموا اللسان او نعرفوا الحروف اللي راه مكتوب بيهم. راه مكتوب باللسان اديال الرياضيات أو الرموز اديالو هما المثلثات، الدواور أو اشكالات هندسية أخرى، ابلا هاذ الوسيلة راه مستحيل أي إنسان يفهم فيه كلمة وحدة. ابلا بيهم، راه ضلال ف الخسران ف متاهة كحلة"

هاذ الإعلان شكل تحول او منعرج حاسم ف تاريخ أوروبا المعاصرة او رجع الثقة للشعوب اديالها اللي كانت تحت تسلط الكنيسة اللي كانت كتشوف بأن المعرفة ما يمكن اتكتاسب إلا باللسان اللاتيني الميت، الشي اللي خلى الدرايا او المعرفة تنتاشرف كل هاذ القارة بلسوناتا المحلية او انتاشر التعليم الصناعي او ما عمر كان اللسان خلال عصر النهضة حاجز لانتقال الدرايا بين هاذ الشعوب بل حقق تراكم ما عمر حققوا البشرية ملي ابدات الحضارة، فازداهروا التواليف او الترجمة لدرجة اكتشاف المطبعة، او اتنقلوا ديراوا من ابلاد لبلاد لتقديم المعرفة اديالهم او الاكتشافات اديالهم او للتعليم او المناظرة.

فلو كان ماشي هاذ الحقيقة ما كانش اتكون الدرايا كونية او اتشكل تراكم لصالح البشرية من بداية انفصال الإنسان اعلى مجتمع الحيوان. فكل الحضارات كما بينت كانت الدرايا كتمارس فيها باللسان اللي كيهدر بيه المجتمع او كيتواصل به. فنقرضت هاذ اللسون ولكن الدرايا واصلت التطور اديالها بلسون جديدة حية او اميسرة. حتى انه يقدر الواحد ايوكد بأن انحطاط هاذ الحضارات كان بسبب موت اللسون الأصلية اللي كانت وسيلة تعليم هاذ الدرايات الشي اللي أدى لعدم القدرة اعلى استمرار التوطين اديالها باللسون الجديدة الحية او انعكاس هاذ الواقع اعلى ضعف استمرار التحضر فيها حتى غبرت.

##### 5- توطين الدرايا ما يمكن اكون غي باللسان الحي اديال المجتمع:

لو ارجعنا لكلام ابن خلدون اللي اذكرت منقبل، فهو كما لاحظت ما التفتش للسان كشرط باش تزدهر هاذ الصناعات أو إنما اربطها بالتحضر، او التحضر هو مجهود جماعي او حصول اديال المساهمة اديال كل فرد ف المجتمع. كذلك ف النص اديال غاليلي الفوقاني، كيبان بأن هاذ الدراياوي كان واعي بأن الدرايا مايمكنش يستولي اعليها شي لسان كيف ما كان، فهي عندها لسانها اللي يمكن يستوعبو أي لسان حي، بينما ما يقدرش لسان ميت ايوكب التطور اديالها، لسان الدرايا هو بمثابة لحبل ولا القطرة اللي كتربط اللسون الحية، حيث عبر التاريخ دايمًا كتلقى اللسون كتاخذ من بعضها بعض المصطلحات ابلا عقدة ولا خوف حيث المصلحة

كتفرض هاذ المسألة. هاذ القناعة هي اللي دفعاتو باش يكتب واحد من اشهر الكتوبا ف تاريخ الدرا "حوار اعلى المنظومات الكبيرة اديال الكون بجوج" ف 1632م، اللي انتاقد فيه نظام ابطوليمي باللسان الطلياني اللي كان ماشي معترف به ف وقتو كلسان درية.

فف كل المجتمعات بما فيها المجتمعات المتخلفة فيها صناعات عتيقة، كيسيوها عندنا الصناعة التقليدية للأسف (\*)، كتمارس او كيتم التعليم اديالها او كتوارث بدون حاجة حتى للمدرسة و إنما فقط ف الورشة. هاذ الصناعات راه مورها درية، وخی اليوم كيبان عندنا ابسيط او كيما رسوه ناس من العامة، فهو ف الدول المتقدمة مجال اديال الابداع او اديال تطبيق الأبحاث الدريوية المتطورة او منو خرجوا معظم الشركات العملاقة او اللي ولات عالمية. هاذ الصناعات كيتمارسوا بلسان التواصل اديال المجتمع ماشي بشي لسان آخر، فالواحد ما يتخيلش شي انهيار يدخل عند شي معلم نجار ولا سدور ولا صياغ ولا أي احرا في معلم ف الورشة اديالو او يلقيه يتعافر مع شي متعلم ايوريه كيفاش يكتاسب المهارة اديال الحرفة او يتقنها باللسان الطبيعي اديال التواصل اليومي أو ايگول ليه: "احبس السي محمد آش كتدير؟ ايخصك اتعلمو بلسان قريش ولا لسان افرانسا و لسان الدرا العالمي"! أكيد إلى كان هاذ المعلم ما ف انهاروش غادي ايشير اعليه بشي امطريقة ولا بشي مفتاح.... حيث غادي يفهم بأن الهدرة ابحال هذي ما هي إلا تضاياع للوقت او حيلة باش ايضيع الصناعة او ايضيع الرزق اديالو امعاها.

فتعليم الدريات، إلى راه يندار اليوم ف المجتمعات المعاصرة ف المدرسة، فعلحقاش كما اذكرك الصناعات اللي ف الحضارة المعاصرة اكثر او امنوعين او امعدين او كيطلبوا معرفة او درية امعدين، الشي اللي انتج اعليه تعليم امعد أو كيطلب إمكانيات أو كفاءات عالية أو ايخص يتوفر لكل الناس باش الجميع ايشارك ف مسلسل التحضر المنشود. هاذ الهدف ما يمكن يتحقق إلا بتعليم هاذ الدريات بلسان المجتمع الحي اللي هو لسان التواصل اديال كل افراد المجتمع ف الدار او ف المدرسة او ف الصالونات او المؤسسات او ف الزنقة، ماشي بشي لسان آخو كان ميت ولا أجنبي ولا حتى عالمي، لأنه ف هاذ الحالة إلى اتبناها شي مجتمع النتيجة غادي اتكون الجمود او المحاصرة اديال أي محاولة اديال التحضر الشي اللي غادي يغرق المجتمع ف التخلف او عدم القدرة اعلى مسابرة العصر. ف اليوم ف كل المجتمعات اللي كتخدم اعلى جال التقدم او التحضر كتمارس التعليم اديال الدريات بلسانها الحي، او المدرسة فيها ماشي عالم منعزل ولكن كيتداول فيه نفس اللسان اللي كيتداول ف الدار او ف الزنقة او ف الشنطي، او ما كيفكروش تماما، ف مرحلة تملك أصول او مبادئ المعرفة او الدرا، انهم ايقريوا باي لسان من غير لسان الماين، فف أوروبا كل دولة كتقري بلسانها، ف روسيا، ف الصين او ف غيرهم، او كل هاذ الشعوب كتساهم بشكل اكبير ف تطور الدريات او الصناعات او التكنولوجيا او عندها دور اكبير ف التحضر العالمي. هاذ الواقع كينفي انه ايكون كاين لسان اديال الدرا العالمي. المقصود بلسان عالمي للدرية ف هاذ العهد اللي كنعيشوه، اللي كيتمثلوا اللسان الإنكليزي، هو أنه لسان فقط كيسهل انتقال الإنجازات الدريوية

(\*) هاذ الترجمة من بين الأمثلة اديال فشل استعمال لسان ميت ف المدرسة حيث اللسان الميت ما يسمح بالابتكار ف الترجمة ولا التكيف او التوسع ولكن فقط بتلصاق الشي اللي موجود ف الهيكل اديالو.

بين المجتمعات اللي لسونها مختلفة لكونو لسان حي او المجتمعات اللي كتهدر بيه كتساهم بشكل اكبير ف التطور الدريوي، إوا بدل ما كل مجتمع ايدير مجهود اكبير او ينفق ميزانيات باش ايترجم للسان اديالو كل اجديد ف كل مجالات الدرا او الصناعة او كل شان من شيان الحضارة، احسن اتكون عندو نخبة كتتنقن هاذ اللسان باش اتكون قادرة اتواكب الجديد اللي كيئتشرف العالم، او مادام أن المصلحة ف هاذ الباب هي مشتركة بين شعوب العالم فحتى هما ملي يكتاشفوا الجديد ف المجالات اديالهم ايخص اينشروه للعالم بهاذ اللسان باش يسهل الانتشار اديالو اعلى مستوى العالم، ولكن ف نفس الوقت ايخص اكونوا قادرين باش اخلخوا المجتمع اديالهم مطالع اعلة اشنوا كيدور ف العالم بالتعليم او التوليف او الترجمة عند الضرورة، باش اتحقق الفائدة لصالح التحضر. ف هاذ الاتجاه هاذ اللسان العالمي مفيد، أو كل لسان آخر حي، ف مرحلة ما بعد التمكن من الأسس او المبادئ اديال التفكير الدريوي بلسان لمّين، ماشي من البداية كشرط باش ايتم تعليم الدرا. فاللسان العالمي إوا هو لمرونة التواصل بين الأمم وتكاتف الجهود باش اتعم المعرفة اعلى مستوى العالم، او لهاذ الشي كيصلح للكتابة او التوليف لهاذ الغاية ماشي لكتابة المقررات المدرسية، فمادام حي فهو كيدفع التحضر باش اكون بسرعة اكيرة بين الأمم حيث كل مجتمع كيطلع للتحضر كيستوعب بالزربة الشي اللي كيروج من معرفة اجديدة باش يستافد بيه.

## 6- التوليف إلى كان بلسان ميت كيقتل التحضر

بما أن التعليم اديال الدرا ولّى صناعة، فهو محتاج للتوليف باش اتوفر المراجع للمتعلّمين من جيه، او باش يتوثق الإنتاج المعرفي او ينتشر بين المجتمعات المتحضرة او يدفع التحضر بشكل عام دايمًا لقوّدَام. فالتوليف ف هاذ المجال كان دايمًا كيكون بلسان المجتمع اللي كيتواصل بيه ف حياتو اليومية، أو انتشار المعرفة بين المجتمعات اللي اللسون اديالها مختلفة كيتم بالترجمة. التوليف بغير هاذ الطريقة كيمنع التحضر او انتشار المعرفة او الابتكار بين افراد المجتمع خاصة إلى كان متعلق بالمراجع للمتعلّمين او بتوطين الدرا. التاريخ كيثبت هاذ المسألة، فمّلي كيتم التحوّل للسان ماشي متداول ف الواقع، كينهار مسلسل التحضر أو يتقوى الواقع اديال الانحطاط. من بين الأمثلة اللي كتعكس هاذ المسار، استعمال العربية اديال قريش عند المسلمين، خاصة لعرب، أو اللاتينية اديال الرومان عند المسيحيين، خاصة ف أوروبا، ف القرون الوسطى، فف الحالات بجوج ما كانش شي مجتمع من المجتمعات اللي كانت مصدر اديال هاذ التوليف يتكلم هاذ اللسون، ولكن كانت فقط لسون اديال السلطة او الطبقات المهيمنة ف الامبراطوريات اللي كانت سايدة، فكانت التوليف كتداول فقط ف دايرة حاصرة اديال هاذ الطبقات او ماوصلتش لعامة الناس أو إيوا ماوصلتش باش اتساهم ف التحضر العام اديال المجتمع او اقتصرت فقط اعلى ما كانت تعتاقد الطبقات الحاكمة أنه ضروري لاستمرار السيادة اديالها كما هي.

هاذ الواقع أدى لتصور أيديولوجي كيحترق اللسون المتداولة او يعتبرها "عامية" (langues vulgaires) أو لسون التوليف او الدرا، اللي هي لسون ميتة، لسون "عالمية" (langues savantes) حتى وهّموا عامة الناس بأن هاذ الأمر طبيعي مستقل اعلى الإرادة اديال



الإنسان. هاذ التصور انتج اعليه انحراف اعلى الهدف الحقيقي من تعلم الدريات أو اصبح غرض المتعلم ماشي الصناعة أو التحضر ولكن البحث اعلى الاندماج ف الدويرة اديال السلطة أو النبلاء بممارسة الخطابة أو الديوانية، فتم احتقار الصناعة اعلقاش هي شان العامة، الشي اللي أدى لتوقف تحويل قوة الملكة العقلية للفعل، كما عبر اعليها ابن خلدون، اللي تسمح بتطور الصنایع اللي تستاجب لحاجيات التحضر. فكانت العاقبة اديال هاذ الانحراف غرق أوروبا ف الظلمات لقرون أو انهيار كل محاولات التحضر عند المسلمين أو تفكك الإمبراطورية اديالهم. إلا أنه ف أوروبا بداية من القرن 16 ابدوا المفكرين أو ديراوا اديالهم ايعيقوا بهاذ الانحراف أو رجعوا للطريق الصحيح أو والموا التوليف أو التعليم اديال الدريات باللسون الحية اللي هي لسون التواصل اليومي اديال المجتمعات اللي عايشين فيها. ف الفرنساوية مثلا ولات لسان الدرايا بداية القرن 17 ، ديكارت مثلا كيببرر التوليف بالفرانساوية عوض اللاتينية بالقول:

" « Si j'écris en français, qui est la langue de mon pays, plutôt qu'en latin qui est celle de mes précepteurs, c'est à cause que j'espère que tous ceux qui ne se servent que de leur raison naturelle toute pure jugeront mieux de mes opinions, que ceux qui ne croient qu'aux livres anciens. »"(4)

"إلى اكتب بالفرانساوية، اللي هي اللسان اديال ابلادي، بدل اللاتينية اللي هي اديال المعلمين اديالي، اعلقاش كنتمنى باللي گاع هذوك اللي ما كستخدموا غي المنطق الطبيعي اديالهم حوراوي يحكموا احسن اعلى الأراء اديالي، من هاذوك اللي ما يعتاقدوا غي بالكتوبا لقدام"

هاذ الوعي أدى للتطور ف أوروبا كاملة أو اعطى الثورة الصناعية رغم تعدد اللسون ف هاذ القارة. فهاذ التعدد ما عمر كان معرقل للابتكار أو التطور، و لكن بالعكس كان حافز لنشر المعرفة بدون حدود أو ربطها بالازدهار أو التقدم اديال هاذ الشعوب، الشي اللي خلاها تمشي ابعيد ف التكنولوجيا المدنية أو العسكرية أو تفرض الوجود اديالها اعلى العالم ف الاقتصاد أو السياسة.

في حين اتجمد المخ عند العرب أو ف المناطق اللي هيمنوا فيها رغم "فساد لسان العرب اللول" بتعبير ابن خلدون، بينما انساحبت لمصار المسلمة من هاذ المسار أو استمروا الناس اديالها ف تدوال التعليم أو الدريات باللسون المحلية المتداولة بيناتهم ولربما هاذ الشي اللي خلاهم يسترجعوا الإرادة اديال التطور أو التحضر نسبيا ابحال ف إيران أو تركيا أو غيرهم. بينما استمر الانحطاط عندنا حتى ولّى اللسان العربي اديال قریش جزء من العقيدة أو واصبح ف المخيلة اديال العامة هو الخزان اديال الدرايا ابحال شي مخزون امحجر ( réservoir fossilisé) يكفي اتطیح فيه باش تستخرج الكنوز اللي فيه. هاذ العقلية انتج اعليها الاعتقاد أن اللي اتمكن من هاذ اللسان اتمكن من اجميع الدريات. هاذ الانحراف اعلى الصواب خلی السجع هو المنطق أو فن الخطابة هو التحليل الدراياوي المطلوب، الشي اللي كرس الخرافة أو الجهل بين الناس أو اقتل كل محاولة ايال التحضر. هاذ الشي نبهوا ليه المفكرين اديال

المسلمين هاذي اقرون، ف الإمام الغزالي مثلا ف اكتابو "إحياء علوم الدين" ف التقديم لأسباب توليفو هاذ الكتاب أنه لاحظ أنه اطغى ف المجتمع هاذ الاعتقاد حيث ايگول (5): " ولقد خيلوا إلى الخلق أن لا علم إلا فتوى حكومة تستعين به القضاة على فصل الخصام عند تهاوش الطغام، أو جدل يتذرع به طالب المباهاة إلى الغلبة و الإفحام، أو سجع مزخرف يتوسل به الواعظ إلى استدراج العوام، إذ لم يروا ما سوى هذه الثلاثة مصيدة للحرام و شبكة للحطام"

ثم كيگول ف نفس الكتاب (5):

"فصار يسمى المجادل المتكلم عالما و القاص المزخرف كلامه بالعبارات المسجعة عالما، وهذا لأن العوام هم المستمعون إليهم فكان لا يتميز لهم حقيقة العلم من غيره" كذلك ابن خلدون انتابه لهاذ المصيبة اللي عمت مجتمعات المسلمين أو نبه ليها ف المقدمة اديالو حيث ايگول أو هو ايحاول يفصل المجهود اديالو اللي دارو ف المقدمة المشهورة اللي أسس فيها لدرية الاجتماع اعلى فن الخطابة (1):

" و أعلم أن الكلام في هذا الغرض مستحدث الصنعة غريب الترفة عزيز الفائدة اعثر عليه البحث و أدى إليه الغوص و ليس من علم الخطابة إنما هو الأقوال المقنعة النافعة في استمالة الجمهور إلى رأي أو صدهم عنه"

للأسف هاذ التنبيه ما فهموش العرب ف وقتو أو ما زال ما قادرينش يستوعبوه، بينما شكل الإشارة اللي التقطوها ديراوة ف أوروبا أو ابناوا اعليها عصر النهضة اللي وصل أوروبا للحضارة اللي وصلت ليها اليوم.

الدريا إوا ماشي هي اللسان، ولكن كل ما اطور اللسان او اتمكن مجتمع ما، كل ما اللسان كيتطور أو المجتمع كيتحضر أو كيستقر، او اللسان باش يتطور ايخصو اكون حي يعني اكونوا يهدروا بيه الناس او بيه يتبادلوا المعرفة او ايوطنوا التكنولوجيا او احققوا التحضر. فكيساهل ف هاذ الواقع التوليف اعلى الناس او يزدهر الكتاب او الصناعات اللي مرتبطة بيه او اتوسع القاعدة اديال القاريين او يتعمق التماسك اديال المجتمع او النظام. أما إلى استمر الواقع كما راه حتى اليوم ف المجتمعات اديال العرب فما يحلمش الواحد ان التوليف ف الدرايات غادي يتطور او اساهم ف التقدم أو أن القراية غادي اتعمم بين الناس أو أن التعليم غدي يعطي شي نتيجة لصالح التقدم او الازدهار.

مراجع:

(1)- مقدمة ابن خلدون (Source: <http://saaaid.net>)

(2)- احياء علوم الدين اديال أبو حامد الغزالي

(3)- موقع انترنيت يتكلم اعلى گاليلي

<http://lerefletdelalune.blogspot.com/2014/07/galilee-lunivers-est-ecrit-en-langage.html>

(4) [https://www.pourlascience.fr/sr/presence-histoire/ecrire-la-](https://www.pourlascience.fr/sr/presence-histoire/ecrire-la-science-en-francais-au-moyen-age-2949.php)

[science-en-francais-au-moyen-age-2949.php](https://www.pourlascience.fr/sr/presence-histoire/ecrire-la-science-en-francais-au-moyen-age-2949.php)

(5)- احياء علوم الدين، أبو حامد الغزالي